

PARABULA

Ci dissi la farina a lu sò saccu:
St'attentu, nun mi tacchiari cu piloccu!
Ci dissi lu vivituri a Patri Baccu:
Tu facisti lu vinu e iò lu toccu!
Ci dissi lu zappuni a Petru Ciaccu:
Cu tempu t'arridducivi comu un corcu,
Parìvi un Garibaldi nta lu sbarcu,
Summannu tuttu, hai nuddicatu un porcu!

LU POSTU DI BIDECCA

La figghia di un tali, cerca postu
E curri tra Assissura e Diputati,
Ma ora li cosi su canciati,
Ha scrittu littri, nuddu ci ha rispostu.
Mi fà pena, usa un po all'antica,
Bisogna darsi alla mudirnitati,
Liggiti li nuvelli e v'addistrati,
Sparagnàti un saccu di fatìca.

Na signurina, interprovinciali,
Si prisintau a un presidi di scola,
Nun sprecau mancu na parola,
Fici la mossa, isàu la gonnella;
Lu presidi cu affannu cci dicìa:
Prestu ti dugnu un postu di bidella!

L'INCIDENTI STRADALI

Cu tutti chisti machini,
Chi cc'esti strati, strati,
Spissu li gummi fiscanu,
Pi li granni frinati.
A tutti piaci curriri,
Cchiui di centu all'ura,
Li danni li riparanu,
Cu pratica e bravura.

Na bedda signurina,
Chi lu curriri piacìa,
Un picciuttazzu fanfulu,
La ncoccia mmezzu a via.
Puntatu era cu l'occhi,
La curva fici larga,
Pigghiari ci vulìa,
Lu numaru di targa.

Idda essennu sperta,
Fà subitu na frinata,
Lu picciottu scognitu,
Ci duna n'ammaccata.
N'ammaccata forti,
Curria a tinchitè,
Ci scansa lu davanti,
La ncoccia pi darrè.

La signurina scinni,
Tutta nfattariata,
Dicennu: Amicu meu,
Ma chi sbagghiastu strata?
Chi voli mi cunfusi,
La pregu di scusari,
Vitti lu detru liberu
E vosi accillirari.

Chi c'entra lu darrerri,
Iò subitu, all'istanti,
Fici signu cu la manu,
Pigghiatimi davanti.
La pregu signurina
Le chiedu scusa arreri,
Accumudamu i cosi,
Chiamamu u lattuneri.

Lu lattuneri dici,
Guardannuci li roti:
Lu davanti di sta machina,
L'haiu ggiustatu tanti voti.
Chi voli signurina,
Cu stu trafficu chi cc'è,
Cu si ntrumma pi davanti,
Cu si ntrumma pi darrè.
La signurina ncollura,
Cchiù nun dici comu fù,
Comu s'intrumma ntrumma,
Si stà zitta e un parla cchiù.

Signurineddi principianti,
Sa vittura unn'è rutata,
Calculati u paraurti,
Prima di fari la frinata,
Chi si sbagliati un sulu colpu,
O fallisci a calculata,
Si vi succeri qualchi ntoppu,
Vi resta a machina scassata!

LU NOVU TAGGHIU

Ora cu stu novu cusi e tagghia,
Li sarti vannu a lu disbrigu,
Basta una piccula ritagghia,
Pi cintura, supra lu biddicu,
Lu sutta comu Eva nta lu pumu,
Ci basta mezza pampina di ficu!

L'ASSALTU A LA CURRIERA

Eramu tutti supra la curriera
E fomu assaltati di li foriliggi.
Chi lu Patri Crucifissu nni prutiggi!
Vicinu lu paisi di Ribera,
Ficiru li soliti prudiggi:
Si rastrillaru tuttu soccu cc'era,
Si pigghiaru li fagotti e li valiggi,
Nni lassaru suli, nta na cantunera!

Na signurina figghia di papà,
Avìa n'aneddu di petra priziusa
E virennusi propriu cunfusa,
Si l'ammucciau a centru gravità.
Un ladru passa a la rinfusa,
Mantinni custumi e serietà,
La cerca, la cuntempla nto mumentu;
L'aneddu si truvava nsalvamentu!

Tuttu racconta a l'arrivata,
Suddisfattu rispunnìu so patri:
Si c'era la bon'anima di to patri
Nun lassava nenti pi la strata!
Lu so cori granni quantu un mari.
Senta ntoppi e senza na litigia
Figghia mia tu suffristi pi l'aneddu,
La bon'arma sarvava puru la valigia!

LINGUA BOLOGNISI

Passa Peppi. Chi veni di Bologna?
Cun ti vù, havi un pezzu e un pizzazzu!
Sugnu moddu comu na carogna,
Lu studiu mi duna un gran strapazzu.
A Bologna la mè prufissura
Mi va pidinannu comu na cicogna,
Mi duna lingua senza na virgogna,
Batti l'accentu e la puntiggiatura.

La sira mi la ripassava,
Vidia la luna, lu sulì, li stiddi,
M'arrizzavanu puru li capiddi
E cu la pinna ci l'apustrufava.
Ma un mè cumpagnu di la zisa,
Chi canuscìa li dialetti, veru,
Quannu pruvau la lingua bulugnisa,
Rrivau a la porta di lu cimiteru.

LA TELEFONATA

Passa la signura ch'è preoccupata,
Avìa lu maritu a lu spitali,
Era la vigilia di Natali,
Vulìa fari na telefonata.
Pinsau chi vicinu, appressu strata,
Ci avìa lu negoziu Don Pasquali.
Don Pasquali, famigghia genti bboni,
Lu telefonu a disposizioni!

Don Pasquali cu massima attinzioni,
La rutella cu lu iritu girava,
La signura pu maritu spasimava,
Prestissimu lu numaru cumponi.
Ma prima cu telefonu squillava,
Usava Don Pasquali a la signura,
Un passàrici in manu la cuffietta,
Si prima un c'infilava la spinetta.

LU VINNITURI DI OVA

Haiu li beddi ova,
Grossi e campagnuti,
Sù quantu li prugna,
Lisci comu i cuti.

Vinìti avvicinati,
Mircati vi li passu
St'ioru ch'è Duminica,
Vi fazzu un gran ribassu.

Un vecchiu s'avvicina:
A quantu li passati?
300 liri l'unu.
E vi parinu mircati?

Cu 300 liri
Mi nn'aviti a dari dui.
Sta borsa nna viriti
Chi vi la sucati vui?

Dopu un pizzuddicchiu
Rrivau na signurina,
Russa, stanca morta,
Avìa la ciatatìna.

Cercu dui beddi ova,
Frischi, grossi e lisci.
Lu prezzu stava nvista
E subitu capisci.

Pigghiassi signurina,
Ci veni un bon ragù,
Di st'ova campagnoli,
Dumani un cci nn'è cchiù.

Viriti chi sù grossi,
Inchinu la manu,
Si nni pigghiati ancora
V'inchiti lu tianu.

Pu tianu c'è la carni
Cu burru, ngrangiatedda,
St'ova beddi grossi
Mi sbattu nta paredda!

LA SIGNURA A LU BALCUNI

Mentri d'un balcuni na signura
Dumanna a un picciottu siniaru:
"Dicitimi ch'aviti di virdura?"
Ci cala cu la corda lu panaru.
"Un brocculu, un citrolu, na nzalata,
Lu citrolu chi nun fussi amaru,
La virdura chi nun sia allignata".
"Liri quattrumila, cuntutu paru.

Forza signura si mittissi mposa"!
Lu siniaru sutta lu balcuni.
La signura tira e si riposa,
Nta li manu atturcigghia lu curduni.
Lu picciottu di sutta ossirvava
Nta l'incrociu di la congiuntura
E, guardannu la signura, ci nutava
Chi supra era biunna e sutta scura.

LU PUETA

Viriti lu pueta comu è fattu.
È strattu d'intelligenza e di valuri,
Virennu ti cummina lu ritrattu,
Comu un pinzeddru di un celebri pitturi.
È lu ciriveddru propriu adattu,
Ti scrivi saguma, culuri,
Cu modi, versi e cu paroli,
Un libbru pi leggilu cu voli.